

«Art» senza cunfins

Il Cristal da Pro Infirmis 2014

■ (cc) Il Cristal da Pro Infirmis stat quest onn sut l'ensaina da l'art. Pro Infirmis Grischun organischescha ina concurrenza d'art ed è stada sorprendida dal grond dumber da participants. 38 objects d'art da gruppas e da personas singulas èn vegnids inoltrads. Quels vegnan exponids a partir dals 27 d'october 2014 en las localitads dal Center da furmazion per la sanadad ed ils fatgs socials (cfss). Mussads vegnan maletgs, fotos, picturas, dissegns e sculpturas. Per accompagnar l'exposiziun metta la biblioteca dal cfss ensemen in regal da cudeschs cun las pli novas medias areguard il tema «impediment».

In'exposiziun d'ART particulara

Il Cristal da Pro Infirmis da quest onn porscha ad artistas ed ad artists cun u senza impediment ina plattafurma per render enconuschents sasezs e lur ovras. En il rom d'ina concurrenza èn vegnids tschertgads objects d'art che tractan avertamain il tema «Nus n'ans laschain betg impedir». En total èn vegnids inoltrads 38 objects d'art che porschan ina maschaida da differentas pussaivladads da s'exprimer. Ils objects vegnan preschentads a chaschun dad in'exposiziun d'art en il cfss. Ina giuria independenta

giuditgescha e valitescha ils objects d'art. Ils criteris da valitaziun èn en emprima lingia la creatividad, l'expressividad e la relaziun cun il tema «Nus n'ans laschain betg impedir». En il center stat l'expressiun artistica. Il medem mument tracta la biblioteca dal cfss sco tema central l'«impediment» e preschenta en sias localitads las novas ediziuns. L'exposiziun e la biblioteca èn avertas per il public durant las uras d'avertura ordinarias dal cfss.

La valitaziun dal public

La surdada dal Cristal da Pro Infirmis ha lieu gievgia, ils 27-11-2014, a las 17.00 en l'aula da l'ibW a Cuira. A quella concurrenza ha il public la pussaivladad d'inoltrar ina valitaziun. Ultra da la summa da premi da totalmain 3'000 francs survegnan ils victurs ina stima simbolica en furma dal Cristal ambulat da Pro Infirmis. En pli vegnan ils objects victurs exponids suenter la surdada dal Cristal fin l'entschatta da schaner en il Rigahaus a Cuira.

Lieu da l'exposiziun: Center da furmazion per la sanadad ed ils fatgs socials (cfss), Gürtelstrasse 42/44, 7000 Cuira. Durada da l'exposiziun: dals 27-10 fin ils 26-11-2014 / uras d'avertura: glindesdi fin venderdi, 9.00-17.00. Er avert la Sonda lunga, ils 15-11-2014 / entrada libra